

訥

菴

詩

存

朱太史竹垞先生成駕湖權歌百
首同人和之倚聲耳而歌一時傳寫
吳越間稱為韻事然所歌者多
流連光景之辭於邑之志乘少
所關係歙州汪生秀峯寓蘭
谿者經年於茲志餘成蘭谿
權歌之如駕湖之數中間山川之

明昭虞人物之俊良民風去俗之淳
朴與夫古蹟之由興而廢由
廢而興物產之昔有今無昔
無今有以及前人所載闕者補
之謬誤者訂正之而其宗旨之
存乎歌又皆語淺情深興高
韻遠詞人咀而味出棹郎習而

成吟準之知吾湖有殊其旨趣
而同其逸鄉耆耆矣秀峰多藏
古書不拒借閱嗜篆刻金
石篆隸略備少喜結客名流
滿座然以性剛直不能俯仰
隨人多忌之者今聞守仇希
之戒涵泳風詩且與漁人田父

取權邪之類之優柔嗔緩者
時之把玩而吟唱之亦足以和
易其性情而益其悌中正也夫
乾隆乙亥夏五長洲友人
沈德潛題於石門舟次

題詞

翠堆烟壑練橫江墨瀟瀟瀟倒
月斜燈火亂數聲漁笛按新腔

周宣猷

第八洞天衆香國溪山真箇水精域我友
汪君本謫仙欲擬營邱兼百幅斗牛之墟
吳會西徧生香草惟蘭谿寓公三載獨倚
櫂此間頗有梯仙梯映門一水流泯泯繞

屋名山如束笥擁書萬卷托櫂歌吟就百
篇還自哂長年從此解清歌鞭羊昨夢初
平過接跡鴛湖潛采叟千古賞音喚奈何
海隅鈍叟施謙

潯陽臥病白居易夔府孤舟杜少陵欸乃
聲中飄泊客千秋詩史一漁燈 文安高
躅烟巒外子煥忠魂灘月中嗚咽蘭陰山
下水歌成四面起悲風 紫巖長嘯北山

北秉國高吟亭外亭應有遺編同禮部選
搜一櫂雨冥冥絕勝土風著陽羨漫誇
耆舊紀襄陽竹枝百首吟蘭谷墨潯都成
王者香師古博堪箋兩漢太冲才可賦
三都如何泛宅蘭江上樵唱漁歌屈壯夫
澱紋波上君工病姑葭山前僕善愁小
住爲佳忘歲暮被君詩句苦勾畱紉齋周
芬佩

如澱江邊水幽人此僦居放歌消歲月無
事逐樵漁堪補圖經佚如聞欵乃餘淋漓
墨瀋在價敵百碑礫萼汀李英

澱溪溪水澱紋生日日拏舟溪上行溪女
不知愁客思晚來漁唱滿江城土風編
入竹枝歌落日酸風撼碧柯不用拏音苦
相和青衫已覺涕痕多堇浦杭世駿
高歌聲遠徹寰區風送雲間入海隅逸響

最宜清夜月餘音猶動晚秋蒲數來人物
成今古點出山川似畫圖蘭草不生春浦
上他年故事得如無南村喬永頤

巖瀨折而上百里爲蘭溪灘雄水清駛歷
亂飛鳬鷺鬱鬱金華峰中有仙靈棲汪君
客其地勝處頻攀躋探奇裹糧往訪古詩
瓢攜邑乘泊野史卷帙勤考稽土風辨纖
細逸事窮端倪製爲榜人歌數與鴛湖齊

吟和瀑泉鳴響苔山禽啼優柔而嘽緩音
節區高低端合被弦筦兼可資談犀漁翁
不讀書一櫂隨東西韻語與傳唱激越驚
村黎山來澹蕩人乘興多畱題薈萃成詩
史妙語開荒翳雒誦有餘味詎比寒蟬嘶
初觀許大綸

幾度蘭江鼓櫂過土風曾問嬾菟羅何來
澤畔閒行客一弄溪聲一放歌 遺愛祠

堂何處尋

明家仲木副憲嘗令蘭谿有遺愛祠

蘭陰山水

空沉櫓聲時荅江樓唱見說吾家有嗣音

黃海非遙故國思澌溪處處欲留詩載

歸西子湖頭去爭似揚州唱竹枝芝谿愚

兄澎

蘭陰城下水漣漪寶婺鍾靈洞壑奇僻壤

爭延名士屐遺踪都入寓公詩喚船野渡

逢桃葉浣筆山窗譜竹枝從此澌溪漁唱

好沿流齊按水雲詞雲亭舒瞻

東臯舊社凋零久感離傷逝情何有往還

影事付雪鴻酬唱唵箋等芻狗似君坎壈

向蘭谿三年讀易江樓栖歸來朋好幾人

在百首新詩手自攜示我回環燈下讀悅

憶春流縠紋綠編郎唱憐昔遊曾汗漫經

行徒碌碌何常蒐討成權歌遺文隱蹟勤

撫羅敷以清詞標麗句補益志乘流傳多

我亦叢殘粉，敝笈章安雜詠，誰收拾書坊。
不廢谷音存一編，相定江湖集。茗溪珠淵，
戴廷燿。

君多山水癖，江上寄情賒。攷古搜名勝，探
幽閱歲華。短箋騰筆陳高唱，授漁家試聽。
清歌發輕舠，拂淺沙。鹿田朱樟。

十里蘭江春水生，榜人齊唱櫂歌行。清遊
盡發江山勝，展卷憑君百首成。聞來倚

櫂發商歌響戛龍門百尺柯直與溪山畱
掌故懸知腹笥聚書多玉笥傳王露

蘭谿櫂歌

古歛汪啟淑秀峯齋

蘭谿名著自唐初地富民淳好卜居稽古
似分姑蔑地楓山底事竟忘書

蘭谿縣唐咸亨五年八月始置隸於婺州姑蔑之名見左傳舊無縣誌惟正德間章楓山先生所輯者頗爲博洽而獨不載此說

風生微澱漾輕波掠岸漁舟動櫂歌愛煞
谿山疑碧處斷雲歸鳥晚來多

縣西南江中水類羅穀文因號灤水
岸多蘭蕙故名蘭谿谿山凝碧北門
城上額也

慎獨高齋跡久傾心箴難向畫屏尋
又牙剩得當階木白髮人言是水沉

慎獨齋在香谿宋賢良范先生浚居
也今廢齋前有古樹一株經年無葉
亦不頽朽耆老皆言是水沉木

城南江畔盡巖阿戶戶高樓俯碧波
怪道香雲飛不散瑣窗春早啟多羅

城南諸山皆迤邐有情而巖谷窈窕
沿江居民多構層樓穴牆作窗北戶
皆然

排擊新都不少休筆叢著述亦風流一般
也有麤疎處布婦空誣壯繆侯

明邑人胡應麟作丹鉛新錄藝林學
山以駁楊升菴自負博雅而舛謬甚
多如引三國志關羽傳注云謂羽欲
娶布妻啟曹公疑布妻有殊色因自
留之按此乃秦宜祿妻並非奉先婦
也何涉之有豈元瑞未親裴注耶

當年摹印推君大蠟匾輒窺細討論剩有

六書分類在老成雖謝典型存

國朝摹印邑中以吳綱君大爲能事
比來竟無善此技者宋進士倪鏗所
著聽松閣六書分類
多置不觀殊可惜也

江水春來碧似油尋芳更好是中洲王郎
藉甚能詩客底事思鄉淚獨流

中洲在城西江中細草平沙春日士
夫多修禊於此明王毓德蘭谿夜泊
詩思鄉淚共蘭谿水
一樣游溪過枕邊

馬公灘外少人家潦淨波澄露白沙秋晚

東峰亭上望一江紅葉艷於花

馬公灘在縣南對江衢發兩水環匝
其外上多相樹晚秋之際火齊萬串
殊大觀也東峰亭在聖壽寺後山唐
洪令所建馮宿有記歷朝修葺今已
廢盡矣

東郊纔看罷鞭春百技當場鬪所能一瞬
上元佳節到村村鉦鼓賽橋燈

楓山先生舊志云立春前一日邑宰
率僚屬迎春於東郊邑中各色行人
及諸技藝之徒各具色服呈其所習
藝業作樂以爲戲傾城士女皆從觀

馬是日清晨邑宰祀太歲畢行鞭春
禮碎土牛鄉人以板上置燈十餘盞
首尾銜接蜿蜒絕
似火龍名曰橋燈

大火西流暑氣收兩川景物劇清幽吳舸
越舸紛紛過誰載蒲帆一半秋

縣基適當衢婺兩水合金之處故云
兩川薩都刺蘭谿舟中詩越船一葉
蘭江上載得
金華一半秋

洞源僻寄白雲隈多半邨民業杈灰如水
香車爭路入棲真院裏曝經回

洞源去邑三十里有小三洞其村居民多業石灰故密屋纍纍而棲真禪院高據山巔六月六月作曝經佛會邑中閨人傾巷而往

春風先到望江樓岸柳青青綰別愁時雨連宵新漲好櫓聲搖夢下滄洲

望江樓在北門江上邑人送迎之處也江雖廣而源近每一雨便有新漲宋真西山先生蘭谿舟中詩櫓聲搖客夢

天妃穹宇峙江津郎罷招邀去賽神見說今年靛花好西門時有醉歸人

邑西城內閩人建有天妃宮頗靈應
春時賽願者無虛日而山中種畝者
頗廣皆閩
人生理也

叢桂何須誇小山雲泉屈曲鎖柴關
多少朱門宅爭及唐園可養閒

唐家園在城東石門澗多桂樹雲泉
繞其門最幽靜澣花溪秋香亭青霞
洞爲尤
勝處

城西江畔數牙檣說是官人舊駕航
政簡時清供應少年年閒然越舫耶

邦人忘舊德甘棠遺蔭盡教空

山意亭在縣南桃花塢之東高峯上
元知州辛忍仁建邑人吳師道有記
繞亭舊植喬松
豫章而今盡廢

黃湓聞說有仙蹤我亦年來學餌松休道
飛昇安可望稚川丹井在三峰

皇初平邑之黃湓人牧羊金華山石
室中四十餘年兄初起往尋之入山
相見問羊何在初平叱石成羊萬頭
初起遂亦棄妻孥服松栢其成仙去
三峰山去縣西北四十里其巔
爲葛稚川修煉之所丹井尚存

木落高眉見遠青
重陽蚤菊弄娉婷
今年嬾向登高去
且坐城南閣老亭

高眉山去縣東北二十五里一峯高聳羣岫迴環石磴臨空松陰蓋地境最幽勝閣老亭卽明趙文懿公遺跡在南城中頗供遠眺

新安閣裏晚涼賒
苑樹青蔥集亂鴉
更向黃公橋上望
雨餘漂出內城花

新安閣據南山巔吾徽人會館也黃公橋相去約二百步城河從此泄水

隄外江光裏
麥苗馬馳沙路健
于潮迴鞭

猶見金龍廟又報前程到板橋

邑至郡必山城南江上金龍廟去縣
十里村多郭姓板橋去縣二十五里
宋僧可威所建蘇簡記云蘭谿縣陸
走郡再舍而近來者捐舟去者問津
車聲足音憧憧達
且板橋局其中途

武安王廟俯長江颺沓靈風颺碧幢多少
少年城上望原來紅粉在蓬窗

闕帝廟在縣西城上其外卽大江來
往商船多泊於此

花園蜂蝶舞輕楊茉莉盈頭逆鼻香只爲

阿侯多秀慧勸郎移住解元坊

花園巷在縣北邑素產茉莉故戴者甚多不以爲貴解元坊在學門西因

胡文善立

處處春風颺酒帘桃花塢裏暢遐瞻樂顏遺宅無人到雙燕銜泥自入簾

桃花塢在縣南門外里許塢中多植桃樹因得名龍舒張景畱僑居蘭谿名其齋曰樂顏黃文獻公潛爲之記

雕樓粉堞切雲浮瀲灩清江繞郭流北錯

南珍俱輻輳佳名不媿小蘇州

蘭邑三面臨水惟東門近山向因百貨交集故有小蘇州之名

靈泉寺額已成灰齒冷諛詞安在哉萬世不磨惟直節試看高聳告天臺

寺有榜曰靈泉之寺蔡京所書也政和四年縣主簿朱恂與知縣俞次契縣丞趙樸縣尉吳師尹輩爲文記之曰書心畫也由書以觀可見所養太師魯國公以道經國爲時周公左右聖王運量天下廟謨成算不可得名其發而爲書則敦大博厚玩之無斂似德含洪包容緩而不迫似量其靜

也一毫不露其肆也萬象森列又云
無間遐邇凡公片書隻字在在有神
物護之云云彼蔡京者何如人哉而
極口稱誦如此當時士大夫諛佞咸
風廉恥安在告天臺趙氏因其祖清
獻公抃每日焚香告天故築此臺邑
令李得陽有記
至今完好無恙

四月馱厨滿市街量珠大賈覓嬌娃施財
誰更如潘老百世高名迴不理

邑中所聚市者惟香菰最廣故業此
者皆巨商大估明邑人潘金紫之父
中年無子妻爲娶妾於舟次得一女
詢之則某太守所出潘惻然歸之不

索其價踰年卽生金
紫人以爲陰德之報

韶春百舌弄朝晴
潑水驛前津
鼓鳴買得

扁舟號蘆鳥金臺灘淺掠波行

山中多此鳥日曙時交鳴喃喃潑水驛去縣南一里許宋名蘭皋元名蘭江水分站明初名蘭谿驛洪武十四年更名潑水驛國朝仍之蘆鳥小舟

名也金臺灘去縣西南十五里

僑居合就馬鞍徐比戶人能釀醪醕鄉味

更推江鯉鱸秋風何用憶莼鱸

馬鞍徐邨名也產佳釀蘭江鯉魚最
美明家朝宗先生蘭谿櫂歌云蘭谿
三日桃花雨夜半鯉魚來上灘國
朝朱竹垞蘭谿道中懷遠詩銀絲細
江鱸

未破新正無個事試燈風過日遲遲相將
去看鰲山景仁惠祠前手共攜

習俗新正不動刀尺蓋本義山新正
未破剪刀閒詩意仁惠廟去縣北二
百步所祀徐偃王也俗傳正月二十
爲偃王生日作鰲山設齋斛命僧諷
經至廟拈香者
皆得預湯餅

中秋涼月印芳庭戲竊金瓜步野坰一角
江樓嫌不足移舟買酒問漁亭

俗例中秋婦人聯臂踏月竊金瓜爲
得子之兆問漁亭在獅巖寺明趙鳳
梧所建也

連村桑柘綠于嵐晴暖人家盡浴蠶匝月
麥苗無快雨乞靈又議向龍潭

龍潭卽橫山潭在蘭陰山下深不可
測故老相傳有龍宅焉故名龍潭爲
鄉民禱雨之所

寒食家家上墓田素車麻髻劇堪憐東風
那管人間恨開徧漫山紅杜鵑

清明寒食各具酒肴祭其先墓新發
則素車麻髻哭於埏側山間多野杜
鵑花開時
一望如火

天池泉畔蘇公墓落日松風湧晚濤一疏
減羅三萬正芳名直與紫巖高

元吳師道小三洞記云棲真寺湧泉
蘇公墓在其左傍有天池泉泓然澄
瑩冬夏不枯蘇公者轍之子遲也建
炎初遲以秘閣出知婺州上言本州

供羅歲增數萬餘疋民實不堪詔減
之紫巖山去縣東二十五里與洞源
相近狀如履金穹
窿深廣最爲高峻

蠟屐來過挂榜山言尋靈瑞舊雲關令威
化鶴冲霄去丹井空餘在世間

挂榜山在縣東城外拔地數十丈延
袤五七里以其橫列學宮之南故名
浩然觀去挂榜山里許唐天寶時建
舊名靈瑞宋治平中改名今已廢中
有白衣真人
煉丹井尙存

文昌祠下荷池水風漾漣漪綠映衫破礎

顏垣誰復顧打門啄木語咕喃

東門外學宮旁水池中多種菡萏上
有文昌祠乃縣宰薛理常所建以祀
范香谿金仁山吳
正傳諸君今將廢

青衿城闕譏佻達掌教誰如李白夫盛德

蘇湖堪接席何辭千里致生芻

李璧字白夫武緣人弘治十二年任
縣學教諭立身端謹待物真誠視諸
生如家人父子丁外艱歸後累任禮
部員外卒於道距官縣學時已二十
餘年聞訃者
猶踵相弔問

娟娟翠竹舊名猶明庶風中蚤放梢攝勝
樓前添萬箇恰如子美在江郊

楓山先生舊志貢賦中有猶竹詢之
土人言不甚長二月中即有新竹攝
勝樓在河西外市趙鳳城所建也杜
子美堂成詩云緣江路熟俯青郊又
云籠竹和烟滴
露梢故借此之

禱木既能生翠葉誦經曾否得靈花榮枯
亦是尋常事有說流傳孰闕邪

宋蘇林洞源棲真院枯木復榮記云
父老相傳舊有石闕寺僧如契貌肖

泗州常誦泗州菩薩不輟口人有疾
病來禱者刺指血書泗州號令佩之
卽愈後寺廢契深入於山見林莽中
有洞穴焉意喜之其下有泉清泚可
燭鬚者泉側有枯木數根因誦泗州
泉爲之湧酌泉以洒枯木默禱曰枯
木再榮吾卽此居三日枯木一根復
敷榮枝葉茂盛父老異之捨金鳩材
以建寺焉

誰將二酉號山房日擁書城坐古香流轉
已歸唐貢士親賢賺得姓名芳

二酉山房在北門城內思親橋畔明
胡應麟藏書處也其址今歸貢士唐

正學

豢龍巖古少經過終歲煙霞護薜蘿澎湃
松濤生夜半錯疑歸海弄洪波

純孝鄉興教寺後有巖名豢龍章楓
山先生舊志云老僧德隣豢龍於此
故名

隴麥呈祥循義里秋芳成錦石涼亭爭如
明遠吟樓上日見香山佛髻青

咸淳壬申歲純孝鄉出瑞麥進士董
坦有贊知縣薛至圖刊於石置壁上

循義里名也石涼亭去縣南二里許
亭旁有小菴歲藝秋色最佳明遠樓
在城北隅胡玆所居徐君善有明遠
樓宴集詩序香山亦在縣北其山富
玉蘭故名香山

神池紅蜨見無由杲杲驕陽劇可憂
仙洞雲生欣有望只愁移腳過他州

道峯山麓有神池方四五尺中潛金
色紅蜨歲旱居民禱之出則有驗仙
洞在太平鄉曉有雲氣則其日必雨

密山怪石儼成行好古誰尋佛跡香
應是

塵囂飛不到觀音巖下有璫芳

去縣北三十里平野中有山突起高數十丈名密山上有觀音巖巖下怪石如笋巖上有佛迹故又名佛迹山奇花異草人迹罕到

春來何事遣蕭閒簇酒尋詩訪石關馬跪
跡荒人不到花時岑寂是崧山

石關去縣城南十里元時磊石拒敵於此故名崧山在縣北山之半有馬跪跡俗傳昔時避兵之所今已無覓

古栢垣中春已深枝頭姑惡逞鴉音東風

零落能仁院草沒香臺不可尋

楊溪橋東有徐用檢所結瞻菴中有古栢垣相傳爲宋元所植明太祖取娶時曾駐師其下有方姓老人拜伏曰此聖天子也喜而賜之詩筵令得遊天下今翔亭以護之姑惡鳥名蠶時最多能仁院宋治平中所建今廢
楊家堰外柳拖黃最好漪裙是鷺塘曲渚
妒他交頸宿時將金豆打鴛鴦

楊家堰在香港谿之南宋楊谿范端杲所鑿鷺塘一名冲塘在橫山鄉廣數十丈長數里金豆比金橘更小邑之所產

曉寒何至欲冰肝萬里征途自鮮歡閒倚
聚星樓玩雪閉門直可傲袁安

楊廷秀曉泊蘭谿有句云曉寒真欲
冰我肝聚星樓宋宗室趙良恭居也
至順庚辰冬大雪良恭置酒招友十
人以韓昌黎詩隨車翻縞帶逐馬散
銀杯爲韵徐君善有序引據歐蘇二
公聚星堂前後讌賓故事惜其詩今
無考

慶成橋上好秋光時有風荷遞水香莫道
長湖長十里長湖爭及妾情長

官橋一名慶成在縣西一百六十步
長湖在武昌鄉長十餘里故有是名

馬嶺蒼茫帶夕曛昏鴉又滿范公墳女兒

渡口風波惡終日相思空望雲

馬嶺並范香谿先生墓俱在縣北女
兒渡在平渡鎮溪流至是東西二百
餘丈水甚湍悍宋紹聖中邑人劉思
恭造浮梁名普濟後縣尉李公彥相
繼修治改名
望雲今盡廢

蛟湖碧浪幾多灣菊圃爭誇十畝間堪羨

王孫有清福日臨絹海與膠山

蛟湖周五里在橫山鄉菊圃趙貢士
用典所居也中有軒顏曰十畝之間
貢士能文嗜古壯年卽
杜門肆志于林泉書畫

儂家住近永昌谿愛弄瓜皮逐浪梯一夜
黃梅新雨漲隨流直到塔山西

永昌溪在縣西發源於壽昌長嶺廿
棠瑞山兩鄉交界處也塔山去縣西
南十三里山頂有伍子胥廟山麓有
隱仙洞高廣如屋嘗有二三人秉炬
遊焉忽聞上有刺
船之聲遂懼而返

竹林同榜憶前明有志從來事竟成必竟

靈湖靈不爽能教菡萏並頭生

景泰初紫巖鄉靈湖有並頭蓮時大姓郭氏家於湖上苦志讀書其年秋郭仲初與兄子時頤聯名鄉薦人以爲雙蓮之應

錢王故井已荒涼掃葉誰爲試煮嘗春暖
閒經游渡過空聞比戶焙茶香

錢王八角井在甘棠鄉青山下今已荒蕪游渡去縣西南五十里

鶴山大節聳巍碧血萇弘事可哀不惜
一身期報主冰心真足並寒梅

鶴山明贈太常少卿陸公震別號也
陸公諫阻武宗南巡下錦衣獄斃於
杖不惜一身卽疏中語也初公在獄
時杖瘡方劇慷慨賦詩有句云惟有
梅花入夢香其
從容就義若此

尋秋在在稻花香信是江東一富疆閒數
前朝文物盛應家賜笏有餘光

邑多良田故產米最廣橫山鄉應氏
藏其祖登第時有賜笏上刻云皇帝
御集英殿賜進士臣應浩十二字皆
塗以金惜其登第之年與事跡竟無
所考

妙絕吳公五字詩問奇載酒悔來遲篋中
廿卷真鴻寶風雅知從濂洛師

元禮部郎中吳師道棲心經穴爲一代儒宗而於五言詩尤妙絕予得其舊抄二十足卷濂洛風雅金仁山先生編集有宋諸儒之詩也

跳珠濺玉滙成潭椒石山前水染藍漫說
武夷峰九曲儂家相較更多三

椒石潭在縣西北椒石山下十二曲山去縣三十里上有飛瀑如簾冬夏不竭

愛民崇儉是今時勤政華堂訪舊基山署
莫嫌無長物尙餘古壁杜公詩

勤政堂在縣治中清心堂前今已廢
元時凡廉訪使者出巡皆視事於州
治至元中浙東僉事杜公秉彝
有暮春行部詩題於後堂壁上

磊瀆坑邊白板齊桃源風景想依稀經鋤
績火吾家事也擬來耕雨一犁

紫巖鄉有磊瀆坑在蜈蚣山之下方
輿勝覽云俗勤耕織至今尙有餘風

春流直下響淙淙悅濟浮橋失舊椿何日

使君重起廢彩虹再見鎖澄江

悅濟浮橋在縣西門外臨跨婺衢二
港宋紹興中江運使衍所創成於知
縣江文衡有橋庄之田以資修葺元
季世亂始散壞明初賈存義李璉諸
邑侯重建俱爲洪水所毀萬歷二十
二年大學士趙文懿公志舉與葉令
永盛重興後亦廢於兵燹國朝順
治初知縣季振宜再建故朱竹垞有
詩云直到蘭谿看明月浮橋不鎖待
吟船今又廢惟以數舟渡人而常有
覆溺之患司民
牧者宜留意焉

保寧古院枕江濱況有松門鑰俗塵一自

雪堂蟬蛻去吟風嘲月更何人

廣長菴卽古保寧教院在城南江濱
漢乾祐元年建雪堂釋超凡能詩畫
曾開堂於其中

縱囚避火愛殊奇還獄誰知盡若期以德
牧人原不負吾家駕部有遺祠

汪國楠字仲木吾徽人由進士來爲
邑令忽祝融爲難廼及囚圖仲木縱
囚出避火息皆如期而至後陞南
京兵部主事邑人爲立遺愛祠焉

往歲無禾耕父驕特畱天庾截吳舫誰

知聖澤山靈助石粉天生取不勞

乾隆十六年浙東大旱蘭邑爲更甚
詔截漕運以濟民食得免流亡而山
間又產石髓土人名曰觀音粉潔白
如麪可作餅餌窮人多雜米屑充腹
清冷不減帝臺漿大甕分嘗聯桂坊辛苦
年年官井水爲他人作返魂香

官井在縣西聯桂坊其上有亭歲大
旱不竭爲一坊居民所賴而閩廣充
貢荔枝諸菓經此取水
灌之能茂遂歲以爲例

慕塢奎章久不存居民猶說范家源尋芳

客歲吾曾到幾樹寒梅傍墓門

范源在純孝鄉宋相范鍾祖墓在焉
有穆陵御書慕塢二字久已不存

谿頭佳句緬楊公爲問遺文剩幾通若論
神明賢邑令風流猶有杖牛翁

楊與立浦城人家於蘭谿受業朱子
之門有谿頭詩云谿頭石磴坐盤桓
時見修鱗自往還可是水深魚極樂
不須妄意要投竿吳師道以爲有道
之言與禽語相關窗草不除意同柳
南隨筆云盛王贊者吳縣人也嘗爲
蘭谿知縣有兩民爭一犢成訟盛乃
使牽兩母牛置於旁而籠掠其犢一

母牛作鰕鮓狀遂得實歸其主晚節
托跡空門固窮以死頗稱矯矯焉

彩衣堂上春萱謝秀野亭前夢草荒畱得
佳書並妙句千年重展有餘香

彩衣堂在苧竿山之陽范宏所作以
悅親者額爲金仁山先生所書今堂
廢而額存秀野亭在香谿東山側宋
通判范滂所作今廢滂乃香谿先生
弟也故香谿先生有詩云惠連
自喜陪幽賞判却歸時側接羅

見山樓上暢遐觀好客王孫屢授餐淹滯
徒教逾匝歲松魚雖好未登盤

見山樓在予所寓趙君宗潮園中卽
予所題也其族叔楠鄰秀才屢餽盤
餐松魚見於舊志云
屬土產然未一目視

到處春山啼竹雞看花閒過萬壇谿不愁
歸路無燈火一片紅霞耀水西

竹雞蘭谿所產能辟白蟻萬壇谿在
蘭陰山附近有董氏一村徧植絳桃
春時花開爛熳如錦
誠大觀也俱在河西

閒挂偏提去訪秋偶經柳巷仰前修誰言
嶺上不堪望翠岫丹楓可破愁

蘭谿權歌

三

元博士盛夬字正卿號蓉峯居柳巷中能文博識名冠當時吳碧谿嘗得宋高宗草書桂花詩碑木正卿見之能考知其爲某年月日賜某人者吳正傳禮部深嘆賞焉停驂嶺上不堪望一片白雲是故鄉元御史管某次杜僉事秉彝墓春行部至蘭谿詩中句也

乞雲有應陳天隱禱雨無虛金景文忠孝克全從古少董君節操更超羣

天隱字君舉世居望雲鄉之中社以篤孝稱母卒歸葬時屆炎暑畏日如焚先期焚香乞雲覆棺已而果應旣窆雲散人皆異之景文字唐佐事祖

父最孝祖嘗患噎禱而隨瘳及父患
疽又禱於天乞以身代疾亦尋愈鄉
人遇旱曰旱無若金公禱必雨果隨
禱而應人以爲孝感董少舒字師仲
與唐佐俱君舉同里人父亡負土築
塋廬於墓側有靈芝之祥時睦寇壓
境妄稱聖公能役陰兵師仲援唐永
徽中陳碩貞興妖伏誅事綴文示衆
衆悟相率抗賊保全者萬餘家

吳奐佳書月鑑荷昔年二妙有誰過零縑
蠹簡無由得絮酒思尋宰堵波

吳奐字德章刻志好學善書能醫著有詩集名蘭渚漁歌朱月鑑字失傳

明初以善畫荷花得名就居旁小池
植荷數品作亭其上坐觀荷之生長
態度便爾筆妙入神今俱不可得矣

懸崖一擲快登仙節並清風嶺上傳不是
潛谿曾立傳誰將彤管續新編

邑人吳履室謝芾本金華人元季兵
亂履出亡芾攜女子入山度不能免
顧爲媵曰汝善視吾兒吾於此死矣
力疾捫蘿而上立巖險絕處先投其
女而身繼之俱死明
學士宋濂曾爲立傳

前代詩僧推至剛氣無蔬笋掌含光石門

一卷遺文在高格真堪配可堂

明初聖羅山僧至剛有禪行能詩詞
姚廣孝之師也有山居句云門外青
山知幾堆白雲閑鎖不曾開嶺梅也
似憐孤惻時送暗香窗外來及砂鍋
嘗煮和根菜不與人間氣味同等句
爲人所稱著有石門語錄棲真寺僧
可立號雪菴蘇文定公之後著有可
堂集傳於世今仁山先生爲跋其後

南城江上我曾居考古人多笑借書朱呂
遺踪無處覓可堪亭亦化邱墟

佳山水亭在城南塔下久廢卽予舊
寓袁氏宅畔地也明徐一清送徐學

正有詩云城南時浮屠千尺凌雲表
下有長流川西注極浩渺風行自成
文匹練澄皎皎臨流構精舍非爲俱
登眺朱呂遺迹存盍饗此談道君今
溯其源學海終可到

桂花墳畔簇天香剪剪西風釀薄涼斜日
四層樓上望大慈巖是滲金妝

城東郭氏祖墳上多植桂人俱呼之
爲桂花墳四層樓在南城盛家最高
聳大慈巖去縣西北五十餘里勝絕
處名洞天一覽董華亭所書也山勢
峻拔合邑皆望見之

覺海行踪絕草痕人言禪坐石猶存遺風
舉國還如醉時禮金身兩足尊

坐禪石在金峰寺側相傳覺海曾坐
禪於此石之上四圍有行迹至今無
草故唐貫休有詩云人言覺海老宗
師隱絕層巔世莫知青草不生行道
跡白雲長護坐禪磯六環金賜飛來
後一派銀河瀉落時借問大心能濟
物龍門風
雹捲天池

東城郭外福興菴叢竹周牆映翠嵐笑凭
鐘樓凝眺處遙林如齊屋如蚶

福興菴在東門郭外數里而山踞巖繞舍多竹頗爲幽邃蓋閩人所建也

程君墓廢劇堪憐寒食誰分一陌錢記得
祭碑當日事過人先見竟如仙

洞源龍山有程濟墓相傳云從建文
帝至皇回菴故卒於此馬鬣頽廢僅
存數尺之碑矣

白鶴西飛去不還琅函寶笈絕微言遇僊
栢已成僊去無復濃陰覆院門

白鶴山去縣四十里俗傳白鶴真人
煉丹之處也宋儒張潤之號思誠子

從北山游深得朱子正學元澹思續
東陽志云遇仙栢在浩然觀前傳云
此栢久枯一日有道士過而斫
之遂復榮茂今不存觀亦久廢

亞夫遺廟一偏崇石像傳聞毅魄雄當日
奇謀渾不用封侯血食是何功

范增廟在苧竿山宋鄉貢進士董綱
記云楚范增廟晉天福間有石像呈
異故廟於此水旱疾疫有
禱必應其鄉人最崇奉之

白雁灘前戲採蓮蒲絲織雨柳拖烟瑞山
也學儂家髻時挽雲鬟鬪可憐

白雁灘去縣西北三十五里與睦州
接壤故無名子有白雁望雲來之句
瑞山在縣西二十五里外舊產瑞麥故名

涼泉舊例俯丹崖孤負尋芳破笋鞭野店
梅花銷歇盡空吟五字范蒙齋

寶惠教寺舊名涼泉在武昌鄉十都
今廢宋蒙齋先生范瑞臣有冬日寓
居寶惠寺詩云人語野橋店鳥鳴桑
柘村又云松桂不改色梅盡亦已繁

逸老閣荒餘碧草明因院古黯金沙御風
且上東巖去閒倚虬松看落霞

逸老閣宋唐堯卿所建也今廢明因
敎院在瑞山上東巖處其東廣嚴院

內多
喬松

琴材已長過檐牙領袖羣仙識不差
驀地一聲雷震起手中斑管便生花

金華府志婺州子城內舊有桐樹十
餘株識云桐樹齊檐出狀元宋紹興
間一株長與城樓檐齊癸丑永康陳
亮魁多士旣而桐爲風折又生一新
枝嘉定間復與檐齊庚子金華劉涓
繼爲大魁皆應前識狀元錄云蘭谿
唐汝楫寫家狀方執筆忽屋上有聲
如推裂之狀衆驚視卒無所見因視

手中筆裂而爲四汝楫自識爲異兆焉後果大魁

孫老寫生渾入妙王郎八體頗能工後時

掌錄成新記多半風流屬寓公

孫志舉錢塘人善畫而更長於花卉老死蘭谿王遠圖嚴州之建德人舊曾僑居真草篆隸俱妙且善左臂作書今尚存

雙蟹難逢六月時澱灘往事已稱奇楓山

更有雲初好至孝人傳在井斜

趙漢父某盛夏患病思蟹漢輒拜澱灘蟹爲浮出持歸奉父疾因得瘥士

人贈詩有雙蟹難逢六月時之句明
季兵潰恣掠鄉村章瑗度之父有成
爲兵拷勒痛憤投井瑗度奮身從之
抱父呼救鄰人擲繩引上再擲繩下
瑗度已氣絕矣

春盡江隄舞柳花拱宸門外散晴霞曾聞
德祐龍蛇戰短鏃時猶露淺沙

拱宸北城門名也宋德祐間唐元章
起義與元兵戰於黃湓灘斬其將奚
達魯元兵
退保桐廬

風流艷說方玄素到處名山有馬蹄怪道

遺編清似水原來高臥在寒谿

明方太古字玄素家住寒谿上因以爲號遊三吳與楊循吉都穆文徵明結社唱和歷八閩匡廬九華秣陵諸名勝到處名士爭相引重晚歲好道建棲真樓居之數年不入城市而卒

詠史詩傳定遠尉九張出自浣花機近來鄉里輕前輩格律何人問發微

詠史詩宋定遠尉徐見心著許白雲爲序杜詩發微宋杜旃仲高所註也

蒼漪閣廢長春蕪竹外山猶展舊圖曾見

耳孫親爲說鸞綾玉軸失桓廚

城中天福山半有蒼漪閣明趙翀建以藏先世勅誥今閣廢而所藏亦散失殆盡矣

槲葉霜乾星紀窮膠舟最是石塘洪褰裳笑涉微波去記取風流樊榭翁

石塘洪去縣西北三十餘里亂石斜出水落尤險亡友厲孝廉鵬字太鴻一號樊榭山民有石塘洪阻淺句云褰裳涉微波故及之

孤絃獨詠忽成編剪燭閒披空自憐不憚

辛勤蒐斷簡要畱故事說他年

地雖禮樂舊邦然儲書甚少卽先朝
諸大家集亦多零落而郭姓所修邑
乘尤不足觀也

蘭谿耀歌終

序

古之才人率有山水癖其見於詩文者謝
康樂柳柳州為最著至今謝柳經過憩息
之地讀其詩文名境與區恍若可即心遊
目想以不得一至為嘆焉甚矣山水之勝
得才人益顯也泐中山水名天下永嘉尤
特擅絕自隋析永嘉郡為括蒼按之地志

康樂詩得於今永嘉地者蓋十居其九而
兩郡山水固未嘗不相埒遊於茲土者苟
不能詩則已能詩者必詩然非才稟天賦
則不足以副山水之勝而自寫其性情所
待比讀秀峯先生甌江遊草一編諸體具
有脩然出塵之致其運思也幽而不失之
癖其下筆也雋而不失之纖未嘗規規然

曰吾以摹仿古人要與古人神明韻度自
爾相視而笑莫逆於心秀峯殆真有性情
所獨得而又兼以山水之助者夫性情者
詩之本源山水者詩之淵藪秀峯學博而
才富生平好遊遊輒有詩茲所薈萃第近
著之一耳然即徧讀秀峯生平詩亦終未
足以盡秀峯胸中所貯之詩莊子曰用老

假不用者以長得其用東坡云無窮出清
新吾烏乎測秀峯胸中之山水哉乾隆癸
未仲秋華亭年家同學弟王永祺拜手題

山名鴈蕩域中之秀無雙水號甌江海內
之奇莫匹忽來紙上如觀聚米論兵活現
毫端不翅昭華吹琯象玉樓之蜃氣驚倒
者百歲老翁湧華蓋之瑞雲下拜者三生
岩石猶歟佳製麗矣新篇則有秀峰汪君
平陽世裔徽國才人夙工白雪之詞素有
青雲之望紅牙檀板樂府喧唱于旗亭黃
絹筠箋墨跡爭填于貞石授梁園之筆札
倚馬千言同鄴下之敦盤連鑣七子携桐

拂石醒酣夢于黃鸝浣手焚香擅寫生于
素繭而乃鼓其遊興蹈彼奧區福地名山
黃帝之鳥號何在洞天仙景赤松之丹竈
奚存惟見陽鳥來時森對層巒之七七銀
濤盡處空瞻瀛島之三三問所有於隱居
雲歸嶺畔沂離棕于信國月對江心行吟
之興方深懷古之思彌切長篇短賦抒素
抱於烟霞累牘連篇奏新聲於楮墨於斯
時也自我思之雖五丁之力不能以山川

贈人八駿之雄不能以耳目周物苟賞心
自得徒默默以無言極勝探奇或期期而
難達則夫長鬚赤腳仄徑自有樵漁破笠
昂肩捷走非無輿隸山靈笑我先生不知
何許人焉花裏逢君此中不解道一字耳
奚若此之蒼茫獨立早儲錦繡於胸中浩
淼扁舟會走龍蛇於篷底豈非山光有幸
綿勝跡於仙巖洵若移情表慶瀾於龍窟
遂使永嘉之境甌越之區何啻韞玉而輝

懷珠而媚者哉噫嘻當年池畔曾夢青草
之春此日堂前更躡碧山之屐映靈泉以
寂寂金雀無聲回至味以津津西施有舌
矣乾隆甲申仲春中浣春江外史壽峯顧
惇量拜序

叙

秀峰汪君少嗜學印工詩同里
杭堇浦館丈亟稱之曩余歸自
閩海讀其蘭溪棹歌即和堇浦
原韻三首題其卷端忽忽已逾十
稔因君近歲從歸歛之錦潭不
復朝夕相見必索觀新詩輒不

輒出今年秋君自雲間來手疏
江遊草一帙屬余為叙乃得受
而卒讀名章通句竊得奔會洵
足追步客兒因嘆吾浙之擅奇
東南者無踰永嘉唐僧一行畫
山河為兩戒而以鴈蕩為南戒
之畫蓋謂巴蜀荆楚之山趨金

凌渡錢塘而結束於此當康樂
典郡時紫馬尋幽蠟屐選勝固
已無奇不披無遽不別迄今讀
江中孤嶼登綠嶂山度斤竹嶺
諸詩猶想見其興多才博寓目
即書之概顧余壯歲漂浮足跡
幾半天下而近在戶閭者翻不

獲一至其處為可吮也秀峰乃
以匝月之期盡攬東甌之勝其
勇猛之力遙奠之興寧尋常所
及耳其詩之工視蘭江放棹時
屢進而益上也老友沈歸愚宗
伯嘗與余言黃海之勝遠更衆
糧者數矣昨秀峰亦有是言且

為余謀入山必資為輓與紫兜
襪襪并脯之屬一以預為準備
而余耄懶日甚不克自奮以慰
良友之望或天假之年不即奄
忽得果此期行當與秀峰把臂
聯吟於七十二峰間即以此叙
為息壤之盟也可乾隆癸未年

九前一日石畬老農傳王露書
於紫陽別墅之簪花閣時年
八十有六

題詞

千尺花潭送客時披吟新卷解新知永嘉
山水登臨興獨寫清輝大謝詩謝靈運詩永嘉山水
底倚歌聲酒半雙鬟吹玉笙唱徹浮谿新
樂府曉鴉歸夢不勝情穆堂許寶善

少讀汪君詩長識汪君面汪君瀟灑半天
成鬢歲能酣文字戰清懷早跨嵇阮林詞
鋒直透芙蓉劍西子湖邊風月賒新安江

上烟花便春颿秋艇鷗鷺隨浙水東西遊
幾遍搗來踪跡溯甌江袖得雲霞詩一卷
龍湫夜雨吼蒼虬鴈蕩朝雲飛白燕層巒
乍上魄屢驚峭壁初捫月猶顫千巖萬壑
寸心羅眼落蓮花青片片興公浪說賦天
台謫仙天姥空雕絢噫嘻此冊抵臥遊傑
筆攢搜峯萬變何當把臂隱江心目織龍
梭書素絹大癡程世錞

滄波千里一帆風滿眼名山掛席中收拾
烟雲入圖畫麝煤鼠尾策元功差差水
綠入東甌雁蕩峯前紀勝遊悔不從君浮
棹去飛泉千尺望龍湫櫓聲搖入一溪
烟晞髮狂歌水拍天何處停舟欲相問飛
霞洞口訪劉仙山經水注任紛羅冰雪
裁成逸思多從此甌江添故事驚人謝朓
一來過含川胡珊

瘦金細楷烏絲格錦囊飛詞堪貯魚卵壘
勻麝丸小蘸渲染淡雲疎雨風流佳趣記
題帕書裙西崑妙句滿腹淋漓墨痕點點
舊粘處聳肩月下微步想搦管沉思浣
殘薇露酒醒香消夢回燈炷惹起吟情幾
許么絃漫譜愛低唱淺斟旗亭戲賭好聽
雙鬟隔簾花外度 調寄臺城路盤溪王
廷魁

探奇甌海陰山水入吟筆觀瀑句爭雄嘯
巖氣殊逸登頓路盈千羈留月周一想見
酒闌時狂歌破寂蔑桃嶺閱奇險雲亭
凌孤危高吟驚山鬼借問知音誰策筇鳥
啼處鼓枻潮歸時惟應與謝客千載同襟
期堇浦杭世駿

借問甌江路若何片帆南指括蒼過平生
未到江心寺丞相謠詩有屬和石門洞

日尋前跡百載心源儼寤歌獨惜收身歸
太晚知君樂事在巖阿直哉許忠

謝客留題處登臨亦壯哉山形控閩越海
氣幻樓臺歷盡騰龍窟吟成倚馬才舊遊
如許續蠟屐擬追陪西溪戴奎

東甌昨歲纂圖經夢見松臺幾點青自笑
蹉跎遲蠟屐輸君獨上謝公亭十八精
藍環雁蕩一條白練界龍湫把君詩卷從

頭讀也擬乘風汗漫遊槐塘愚兄沆
吟徹佳篇齒頰香甌江已覩大文章挾天
才有何人並雅正差堪壓盛唐一編手
授盡咀華紙上烟雲筆底花誰謂騷壇今
乏主我當載酒作侯芭澧溪閭邱廷憲
入社吟人肆攬才華甌江乍遊歷山程複
沓穿雲筍轎溪行詰曲逆浪蘭舟舊蹟纔
逢新知相引謝屐探奇匝月留襟懷浩看

瀑飛千仞健筆都收 慚余寂寞依劉悵
閉置官齋不自由縱馳情選勝匆匆客路
興思覓句渺渺朋儔此夕挑燈讀君行卷
清景清詞豁旅愁他時約共振衣雁蕩長
嘯龍湫 調寄沁園春春暈戴樹元

康樂永嘉爲郡守山川到處品題之伊人
偶泛甌江艇便吐穿雲搜玉辭 花嶺仙
巖筇屐徧狂歌咎咏性情真不須更說詩

篇好酷嗜雲山是可人歸思沈德潛

綿潭之水照天碧綿潭之山當戶闢愛此
綿潭潭上客汲古於潭綆千尺床頭贏得
買書錢千卷萬卷如山積連衡山館負山
隅半貯山雲半書籍秦歟漢歟近代歟尤
富蟲書銀艾赤似嫌潭水空復深坐使山
高天亦窄湖頭西子歲招邀雨雪鶯花頻
蠟屐名流屈指浙西東觴咏能無君一席

春云暮矣掛征帆歸去來兮秋月白甌江
遊草臥堪游佳句時時我心獲北門曾嘆
莫知艱情思殊難蔽三百必於窮者而後
工天下詩人無福澤廬陵廬陵論可刊但
把君詩爲破格古人不見恨相同史籀旣
往李斯亦家珍堪數蓋公之何時爲我開
東壁紀堂朱陵

甌江遊草

古歙秀峰汪啟淑著

雨發錢塘江

解纜乘微雨江邊涼意新
自慚飄泊久聊倩浣征塵

寄杭革浦前輩

不見高人歲及朞月斜
香爇費相思樊川才調名
流冠玉局文章多士師康
濟吟身

休藉酒消磨世事好憑基何時重泛金牛
櫂聽雨分箋共賦詩

桐江曉發

篙師蓐食興捩舵天猶昧橫空白雨來瀟
瀟響篷背遙指桐君廬雲深迷所在石尤
挾銀濤怒激孤舟退起看山作圍坐愛鷗
成隊江柳裊繁絲岸草拖輕黛眠餐困客
途林泉發勝槩朗誦謝客詩清遊儻能逮

江岸白鷺

獵獵輕風颭頂絲
含烟翹立雪離披不須
相見驚飛去我是江南老釣師

七里瀨用謝康樂韻

川途寡俗氛
舉篷恣憑眺
峽樹旣龍葱
江巒復奔峭
新蒲裊輕柔
安榴逞紅耀
泠然清風來
引我發長嘯
置身疑畫圖
丹青呈娟妙
人事久牽羈
恐貽達者誚
擬便買芒屨

磯終焉此垂釣懷古吐閒謠悠悠眎同調

鵝灣道中

篷窓容我暫偷閒欹枕長吟且看山破潤
鑪熏芸細細催耕麥壠烏關關風牽雨脚
半空斷翠染巒腰四面環記取郵籤時景
好蘋花香裏過鵝灣

卽事

抱膝篷窓下吟看雨後山始知爲客好趁

取片時間

客夜謠

蘭缸黯淡燃愁寢積雨釀寒侵客枕格格
灘禽擾旅魂江郎無夢傳紅錦錯怨山城
更漏訛呼童頻問夜如何水縮未能歸乏
翼扣舷茹嘆且狂歌

留題朱家園

衝雨事長征羈懷正煩苦遙見朱氏園繚

垣列楚楚歟門通姓名僻逕紆步武主人
愛客來特削龍團煮于時榴作花猩紅燭
庭宇芳塘湛碧油醜石踞饑虎危樓暢遐
觀虛榭任容與圖書旣清幽彝鼎亦竒古
遠山入晴窓秀色奪眉嫵惜哉糾塵氛未
暇捉談麈好鳥似相留嚶鳴屢窺戶緬然
發新謠微情聊一吐

意行偶題

野花幽鳥亦多情勾我衝泥緩步行不是
天公能解事若爲乞與片時晴

山翠濃來欲染衣一筇扶醉絕塵機陰陰
綠樹渾如畫駐屐微吟戀夕暉

秧針榴火及時新弄袖和風亦可人憇石
更看雲態變便思戢影避罽塵

灩灩山溪走白沙科頭坐玩落巖花無窮
清景難摹寫忽見墟烟幾縷斜

楊公橋

雨來不遑息直指楊公橋嵐靄密于霧漠
漠忘昏朝惟有田中秧欣然粲新苗橫林
帶野色急澗鳴驚濤吠蛤已成市薰風竟
難招平生愛邱壑敢便嗟塵勞

桃花嶺

雨餘喬木綠沉沉送客溪泉有好音杳靄
嵐光青似黛綿蠻谷鳥妙于琴定縈勝景

他年夢忽契幽人千載心得句偶然題薜
壁芒鞋竹杖寄重尋

半醉憑高意洒然陰陰蘿薜午晴天水從
碧玉簪頭落人在青螺頂上旋舉眼欣看
千畝竹驚心何處一聲蟬神仙窟宅真堪
戀擬便携家此結廬

題桃花嶺僧舍

薰風薄日午晴初稱我盤盤度笋興最是

國朝詩集
三
撩人吟興處山南山北鳥相呼
石瀨泉鳴勝管絃一亭如笠倚巖前輸他
退院披緇老飽看朝嵐與暮烟

雨中登樓

積雨釀羈愁聊登旅舍樓濕雲侵戶內銀
竹掛檐頭潤費龍涎餅寒生吉貝裘鄉心
逐溪水一夜到杭州

荆坑

谿山勝絕是荆坑少駐籃輿杖行一路
溪泉清似玉兩崖石壁峭于城陰陰灌木
含新意格格幽禽美好聲未得誅茅專一
壑聊題巖竹寄吾情

石門洞

罪玉洞邊維小舟日斜山暝雲烟浮石門
迴絕塵世跡碧澗浣盡羈人愁支筇直入
披榛篠隆隆梵宇凌霞表怖鶴安棲林已

幽蒲牢狂吼山逾悄天紳百丈天際來鳴
潭怒響如奔雷噌吰水樂容我聽窈窕巖
室知誰開少焉壁月懸東嶺滿地松橫寶
釵影菴前小憇吐閒謠苾芻煮茗勞瓶綆
誠意傳聞此讀書荒畦老樹猶扶疎功成
正好林泉樂咲未收身早退居

蝴蝶

野岸名園遍採芳畢生心事爲花忙倒飛

應怯東風峭倦宿緣愁浩露涼入夢忘形
嗤傲吏偷真妙筆憶滕王銷魂更有堪憐
處不惜捐身助巧妝

暑中過馬生家園留酌索書率用扇
頭鶴沙陳君韻

竹翠籠階醉漸醒微吟小坐水邊亭悠然
不獨知魚樂時有荷香襲硯屏

清冷陣陣柳陰風煥鬱煩襟一洗空閒倚

石闌點筆罷斜暉不覺過窓桐

留雲亭

瑟居鮮好懷幽尋遣閒躅城東有山亭可
以暢遐矚携筇試登臨清曠信超俗于時
苦炎暑欣此無蒸溽灼灼見殘紅沉沉蔭
濃綠一江湛虛明萬彙運亭毒墟烟密成
雲巒翠淨如浴遠艇美微茫新蟬流斷續
藤修裊類蛇柏老森似纛左右窮冥搜俯

仰散煩觸少焉長風來虛籟鳴亭曲緬懷
賣餠兒逸事誰掌錄暮靄猶未興昏鴉已
相促浩歌賦歸歟慚被遊氛束

題蔡生畫蘭卷

南園花冢已消沉遺墨空能感客心好事
蔡郎拈出後啼烟泣露更情深

江心寺追和文丞相韻

吾浙勝景推東甌更愛孤嶼江中浮乘風

鼓枻試躋眺布颿無恙懷陽侯
戕戕兩塔矗霞表雙影爭截長江流
雨餘石髮垂翠縷潮迴沙篆埋銀鈎
倚巖緩帶舒永嘯栩栩恍若登瀛洲
凝神雖在八極內放眼直到天盡頭
掀波喜見魚潏潏拂袖況有松颿颿
暮烟罨樹弄香靄遠山啣日供遲留
濤聲尚作文相怒鳥語不訢高宗愁
綰綬何須嘆窮海浮槎應可通神州
怖鴿孤棲

隣老屋蒲牢暮吼傳危樓夢草佳篇高百
代奎光遺跡經千秋說法誰重此結社忘
機吾久拚盟鷗名泉旣許俗客煮好景愧
乏奚囊收興闌揮袂理歸櫂一笑何趨華
胥遊

南窓

積雨連朝梅子肥綠陰門巷燕交飛南窓
一枕華胥夢悟徹浮生欲息機

舟中夜坐

扁舟微雨後露坐愜幽懷
村釀無由醉田歌亦自佳
生涯從賦分世事懶安排
一笑清風起松林有墮釵

仙巖觀瀑

仙巖瀑布何處尋崩雷噴雪巖之陰
巒迴磴繞欲無路草香稚響俱清心
人間煩暑方熏灼到此蕭然渾不覺
山靈愛客遣珍

禽向我鈎輶美韶樂憇石經時抱膝看跳
珠一一侵衣寒潭邊老蘚積濃翠淵沉定
有蛟螭盤苾芻解事烹芳茗薦齒清冷味
殊永讀書深企止齋翁浮踪却媿如萍梗

聖壽寺卽事

輕雲微雨染山光得得尋詩到上方爲煮
月團閒坐久竹陰暗送一襟涼

小飲縱筆

國江詩集
十一
病畏炎曦不出門且將身世寄清罇補牢
敢怨羊空失說劍堪欣舌尚存利戶名樞
齊鹿夢珠圍翠繞付吟魂多情小雨添幽
興頓失階陰舊暑痕

南亭

雨餘景物幽俯仰得清曠南亭一登臨頓
覺吟懷暢澄江作帶環翠岫開屏障于時
屈朱明平疇翻碧浪候鳥有佳音流雲幻

奇狀好風遞漁歌落日聞樵唱平生厭浮
華山林秉微尚何當釋塵累高步追禽向

寄內四首

綉閣分襟鼻姑正將墮粉客窓驚夢卅
若忽已含葩光陰荏苒不離鞍背船唇
世路艱難有似蠶叢鳥道觸景閒吟因
風寄覽僕本恨人卿須憐我

名場潦倒一無成酒盞詩瓢悞半生不是

薄情輕作別壯心磊落塊難平

天氣清和物物妍閒情偶爾托吟牋碧闌
何日重相凭荷葉田田已可憐

倚閭懷切汝須寬寂寞山居朝暮寒休道
江魚無力致蠶鹽味慣勸加餐

塵境由來屬險巇思歸却恨買山遲蘆簾
紙閣平生願爲報閨中德耀知

盆荷作花對玩率成

爍日懸空百卉萎
天紅數點粲盆池
亭亭逸韻能消暑
拂拂幽香得擅奇
鏡檻常憑風過後
穀波微動月斜時
却慚來往臨平路
輸與僧殊大好詩

爲姚秀才梁悼亡

桃笙夢冷暗生塵
檻外飛花寂寂春
諦想鍾情荀奉倩
翠奩點檢獨傷神

比翼鸛鸛誓願長
淚痕幾度惜年芳
海枯

石爛難消恨望斷蓬壺水一方

春草池

謝公吟賞處夢草尙青青五字擅千古我
生能幾經松蕉森秀黛巖岫展雲屏何必
攜絲竹泉流足美聽

五雜組四首

五雜組漢珠襦往復還銀轆轤不得已帛
纏鬚

五雜組刺文袴往復還木工鋸不得已辭
家去

五雜組剪彩花往復還引水車不得已生
噓嗟

五雜組秦樓瓦往復還驛中馬不得已懸
河瀉

甌江晚發

甌江回短櫂酷暑正如焚客思憐幽草閒

情付斷雲蒹葭含晚色楊柳漾斜暉景物
誠堪住吟身未可分

楊溪

午餘風壓火雲低消渴難尋大谷梨跂脚
篷牕如坐鰓桔櫓聲裏過楊溪

雨過桐廬

靜倚紅舫理故書一篷烟雨過桐廬星霜
荏苒嗟行客蓑笠逍遙羨老漁遠岫佛頭

青欲滴平江僧眼碧涵虛封姨似亦憐歸
櫂添我風帆十幅蒲

抵家

蝸篆蛛絲遍小齋縹緗散亂費安排青青
只有捎牆竹不分蕭涼韻更佳

甌江遊草終

跋

甌江為系熟遊地山川
秀麗人物都瞻嚮市
碑不并名杭余當壯歲豪
健溯江伐嶺十五年中凡
十至焉至必羈留數月

聯轡銓用散榮勝跡回初
于梵剎琳宮寄興於酒
旗歌板向有東嘉雜詠一
卷少化魔曼無少留存從
之散失派光易駛四十等
來也想前塵聚回隔世矣

今乘峯自樟亭挂帆而
上直抵甌郡水陸郵郵豎
旅憩館舍所歷勝安目昇
以會境以筆收皆有詩以紀
感懷觸緒發揮盡致令靈
運之步探步信國之遺韻

南面月事也而余以疲起
舊跡近已哀之不出繁華
瞥見之滋味渾如夢中循讀
清吟經り風景直接通乎老
快閒為可喜然無一詩之足
存以視多文之斐然流布

殊愧昔遊漫浪耳

乾隆歲在癸未重九後二日
七十四老民珠淵戴廷禧書
於耑鵲山館

嚮客爲余談永嘉山水奇麗環逸
神動色飛以不得覩爲恨去年秋
詣玉笥先生許坐間案有小帙展
玩之爲汪君秀峯甌江遊草予雖
未至甌顧耳熟梗槩有年矣約畧
讀之其詩整瞻密緻率與題稱時
或寄情類事抑亦不止於境地玉

笥先生謂余曰識其人否予以未
識對然是時固心識之矣夫人往
來四方不乏佳山水然或羈滯快
悵不暇抒寫又或舛鄙蠢愚口不
得言卽不然而時與境不得當亦
又難矣秀峯以逸才心胸開豁不
爲世故所迫促歷涉勝區雅不相

負其諸生人之幸矣乎而亦名山大川之幸遇也今年春秀峯來杭以遊草索綴一言因卒讀之覺向所聞於客者益不謬而恨不得覩者庶幾若或覩之乃欣然述其端緒附於簡末夫簡末者玉笥先生弁其首矣示不敢埒也甲申仲春

朔後六日錢塘杲嶧葉端拜跋